

Schreibs uff Flerschemerisch!

Gestern hott mich ooner von moine Nochbern besucht. Mir hawwe uns uff die Terrass gesetzt unn ich habben gefroocht, obber was drinke will. Naa, hotter gesaat, ich habb nit vill Zeit, awwer ich muss dich emol ebbes frooche. Unn doodebei hotter enn Zeddel aus soim Säckel gezooche unn hott merrn hiegehalle.

„Scherm“ hott doo druffgestonne unn aach „Wertschaft“.

Les merr dess emol vor was doo druffstehe dut, hotter gesaat, unn ich habb gelese: „Scherm“ unn „Wertschaft“ unn habben dann oogeguckt, weil ich nix verstonne habb.

De Nochber hott soin Zeddel erumgedreht unn doo konnt ich lese: Ich habb die vorsch Woch moin Scherm inn de Wertschaft stehe losse.

Lese mol laut, hott de Nochber gesaat unn ich habb gelese: Ich habb die vorsch Woch moin Scherrm inn de Weertschaft stehe losse.

Siehsde, hott de Nochber gesaaat, dess wollt ich wisse. Scherm habb ich also richdisch geschriwwe unn Wertschaft falsch, odder?

Ja, habb ich ze Antwort gewwe, du hosts gemerkt: Wennde dess so schreibst werrds falsch gelese. Ich det Wertschaft schreiwwe, also mett zwaa Err!

Awwer warum, frächter mich, doo misst ich doch eichtlich Scherm aach mett zwaa Err schreiwwe, odder?

Eichtlich schunn, habb ich gesaat, awwer ess iss so: Außem Zusommehong dut merr richdisch lese, ich gebb derr emol e Beispill, unn ich habb uff soin Zeddel geschriwwe: Geh weg! Geh merr außem Weg!

De Nochber hott sichs oogeguckt unn gemoont: Dess iss awwer komisch, odder? Weil dess erste dut merr wie „weck“ lese unn des zweite wie „Weeg“.

Gucke merr in de Duden, habb ich gesaat, doo frächter mich: Iss doo aach Flerschemerisch droi? Dess grad nit, habb ich ze Antwort gewwe, habb de Duden gehollt, habb geblättert unn habb emm vorgelese: Folgt auf einen betonten kurzen Vokal (Selbstlaut hawwe mir gesaat) nur ein einzelner Konsonant (zu dem hawwe mir Mitlaut gesaat), so kennzeichnet man die Kürze des Vokals durch Verdoppelung der Konsonantenbuchstaben. Beispill Ebbe, schlaff – unn ewe aach Wertschaft unn so weider. Unn nodierlich gibt's Ausnahme, vor allem bei Wörter mett nor ooner Silb. Wenn de awwer enn Selbstlaut long mache willst, dusten grad verdoppele, also Weech, zwaa, joo. Hosdes gerafft?

Moin Nochber hott sich omm Kopp gekratzt. Ich hoffs, weil ich will e Zwiegespräch ferr unsern Oktowerowend bei de Kameradschaft mache unn die Ingeborg, die dess mett mir mache dut, hott gemoont, schreibs uff Flerschemerisch. Dann schreib ich halt Scherrm mett zwaa Err, Wertschaft aach mett zwaa Err unn mett muss ich mett zwaa Tee schreiwwe, sunnst heeßts joo Met unn dess iss was ze drinke.

Sehr gut, habb ich gesaat unn hawwem uff die Schulter gekloppt.

Unn dann hotter sich bedonkt, de Nochber, unn iss gonge. Awwer aach ich habb mich omm Kopp gekratzt unn habb gedenkt: Wenn merr hochdeutsch schreiwwe dut iss dess alles koo Problem, awwer wenn merr was uff Flerschemerisch schreiwwe will unn enn onnern solls lese, dann muss ders erst emol longsom lese unn aach laut. Unn wenn merr dann beim Schreiwwe odder beim Lese aach emol enn Fehler mächt – die Hauptsach iss doch, dass ess nit unnergehe dut, unser schee alt Flerschemerisch.

Eiern Honnes